

17 NOV 1999

Gerakan-Jelutong

KITA AKAN CARI CALON SESUAI MENENTANG KARPAL, KATA LIM

KUALA LUMPUR, 17 Nov (Bernama) -- Presiden Gerakan Datuk Seri Dr Lim Keng Yaik yakin dapat menawan kerusi Jelutong daripada timbalan pengerusi DAP Karpal Singh dengan mengemukakan calon yang sesuai.

"Kita kena cari calon yang sesuai, seorang yang berwibawa untuk menentang Karpal," katanya dalam sidang berita di sini.

Beliau berkata, Gerakan yakin dapat menewaskan Karpal kali ini, tetapi calon yang akan dikemukakan masih menjadi rahsia sehingga Pengerusi Barisan Nasional Datuk Seri Dr Mahathir mengumumkannya Jumaat ini.

Lim juga berterima kasih kepada Dr Mahathir berkaitan senarai calon, kerana hampir 50 peratus calon kerusi Parlimen dan 30 peratus calon kerusi dewan undangan negeri (DUN) terdiri daripada muka baru.

Beliau berkata antara nama calon yang dikemukakan kepada Dr Mahathir semalam, hanya dua kerusi (calon) yang belum diputuskan lagi- kerusi Parlimen Jelutong dan sebuah kerusi DUN di Negeri Sembilan.

"Anda (pemberita) tahu lah...kita hanya dua kerusi di Negeri Sembilan. Sama ada Senawang atau Lobak. Jika anda buat pilihan, anda seratus peratus betul," katanya berjenaka.

Beliau berkata dari 10 kerusi DUN Pulau Pinang yang dimenangi pada tahun 1995, hanya lapan pemegang jawatan yang akan dikekalkan termasuk naib presiden Tan Sri Dr Koh Tsu Koon.

Dalam pilihan raya umum 1995, Gerakan memenangi 10 kerusi Parlimen dan 27 kerusi dewan undangan negeri.

--BERNAMA

NHA RI